



Pou Piblikasyon Imedya: 11/03/2022

GOUVÈNÈ KATHY HOCHUL

**GOUVÈNÈ HOCHUL BAY ENSTRIKSYON AK AJANS ETA YO POU DEPLWAYE
RESOUS ENTÈVANSYON IJANS YO PLISKE TANPÈT IVÈNAL PRAL AFEKTE
MAJORITE PATI NAN ETA A JISKA SAMDI AK GWO NÈJ AK GWO VAN**

*Avètisman kont tanpèt ivènal an vigè jiska samdi nan Reyon Lwès New York,
Finger Lakes, New York Santral, Southern Tier, Mohawk Valley, North Country ak
Reyon Kapital yo*

**Kèk kote kapab wè jiska yon pye nèj oswa plis ak pousantaj chit nèj ki rive jiska
yon pouz chak èdtan**

**Rafal van ki pral depase 72 kilomèt alè kapab rann kondisyon vwayaj danjere nan
fen samdi**

Jodi a, Gouvènè Kathy Hochul te mande ajans yo nan Eta a pou deplwaye resous pou repons dijans yo pliske yon sistèm metewolojik ivènal ap pare pou bay yon lòt seri gwo nèj atravè pifò pati nan New York apati vandredi swa epi kontinye jiska samdi. Yo prevwa yon 6 a 12 pouz toupatou pou pifò zòn, ak nan kèk pati nan North Country, Mohawk Valley ak New York Santral prevwa pou resevwa jiska 18 pouz nèj. Pousantaj chit nèj ka rive nan yon pouz pou chak èdtan samdi nan mitan maten an rive apremidi, epi yo prevwa rafal van ka rive depase 72 kilomèt alè nan kèk kote pita nan jounen an.

"Malgre lè a ap chanje wikenn sa a, New York pa ko fini ak tanperati sezon ivènal la", **Gouvènè Hochul te deklare.** "Ak yon lòt tanpèt ivènal ki pare pou kouvri anpil nan New York nan wikkenn sa a, m ap mande ajans Eta yo pou yo deplwaye resous repons pou ijans yo nan zòn yo prevwa k ap fè fas ak gwo nèj ak gwo van yo. Pandan ke nou gen chans tanpèt sa a tonbe nan yon wikkenn kote sikelasyon an pi lejè, mwen ankouraje Nouyòkè yo rete vijilan epi pran prekosyon bon sans nan wikkenn sa a: Evite kondwi si sa posib pou chasnèj nou yo ka kenbe wout yo klè, epi kontwole previzyon lokal ou a pou evalye kondisyon lokal yo."

Tou depan de tras tanpèt la, lapli ka melanje ak nèj nan samdi epi pwodui kantite nèj ki pi ba nan kèk pati nan Reyon Kapital la, Mid-Hudson ak Mohawk Valley. Yo prevwa Vil New York, Long Island, ak rejyon sid Mid-Hudson pral resevwa yon pouz lapli, epi kèk pati nan Reyon nò Mid-Hudson lan kapab wè jiska 4 pouz chit nèj. Nan samdi swa, yo

prevwa van an rafal ant 40 a 72 kilomèt alè. Gwo van makonnen ak nèj ka lakoz blakawout tout kote ak kondisyon vwayaj danjere akòz nèj soufle ak poud nèj.

Komisè Divizyon Sekirite Teritwa ak Sèvis pou Ijans Eta New York la (Division of Homeland Security and Emergency Services), Jackie Bray, te deklare, "Jis nan moman nou te panse nou ta ka fini ak sezon ivènal la, Manman Lanati ap voye plis nèj sou wout nou. Avèk previzyon jiska yon pye nèj nan kèk kote, sistèm sa a prevwa kreye kondisyon vwayaj danjere pandan pwochen 36 èdtan yo, epi Nouyòkè yo ta dwe fè tout sa yo kapab pou rete andeyò wout yo pandan tan sa a. Nou deja an kontak ak patnè lokal nou yo epi nou pral kontinye travay sere avèk yo pandan tout dire tanpèt la. Nou rete prè pou nou ede nan nenpòt fason nou kapab."

Pou kapab jwenn yon lis konplè sou alèt ak previzyon meteyo yo, vizite sit entènèt Sèvis Meteyowolojik Nasyonal (National Weather Service) la nan <https://alerts.weather.gov>.

Preparasyon Ajans

Divizyon Sekirite Teritwa ak Sèvis pou Ijans yo (Division of Homeland Security and Emergency Services)

Sant Operasyon Ijans Divizyon Sekirite Enteryè ak Sèvis Ijans (Division of Homeland Security and Emergency Services, DHSES) Eta New York la pral aktive aswè a pou kontwole tan ak kondisyon vwayaj yo, kowòdone operasyon entèvansyon ajans Eta yo, epi kominike avèk gouvènman lokal yo anvan ak pandan evènman an. Estòk eta a prepare pou deplwaye resous nan lokalite yo pou sipòte nenpòt bezwen ki gen rapò ak tanpèt la, sa gen ladan ponp, twonsonez, sak sab, jeneratris, bèso, lenn ak dlo nan boutèy.

Depatman Transpò (Department of Transportation)

Depatman Transpò Eta a ap prepare pou li entèvni avèk 3,462 sipèvizè ak operatè ki disponib nan tout eta a. Anplis de sa, 75 manm pèsonèl Sistèm Kòmannman Ensidan an disponib pou sipòte entèvansyon an jan sa nesesè.

Pou soutni aktivite entèvansyon kont nèj ak glas nan zòn kritik yo, yo te deplwaye 17 anplwaye otatal, ki gen ladan 14 operatè kamyon chasnèj ak de sipèvizè ak yon enstriktè operatè ekipman, ak senk kamyon chasnèj nan rejyon New York Santral ak Southern Tier yo konsa:

New York Santral:

- Ap resevwa 14 operatè chasnèj, de sipèvizè ak yon enstriktè operatè ekipman ki soti nan Long Island

Southern Tier:

- Ap resevwa 5 kamyon chasnèj ki soti nan Rejyon Mid-Hudson

Tout manm pèsonèl la ap prepare aktyèlman pou vwayaje epi pral anplas vandredi swa anvan presipitasyon an kòmanse. Y ap reyevalye bezwen pou plis resous, sa gen ladan operatè, kamyon, mekanisyen, ak operatè ekipman yo jan kondisyon yo mande pandan tout dire evènman an.

Tout lokal rezidansyèl yo pral kontinye gen anplwaye sou plas pou yo ka fonksyone 24/24, 7/7 pandan tout dire evènman an ak operasyon netwayaj priyorité yo.

Tout ekipman ki disponib pou nèj ak glas yo pare pou deplwaye. Flòt mekanisyen nan zòn ki afekte yo pral gen anplwaye nan tout lye rezidans prensipal yo 24/7 pou fè reparasyon epi mentni kamyon yo sou wout la.

Kantite ekipman ki genyen nan tout Eta a repati konsa:

- 1,737 gwo kamyon chasnèj pwa lou ak pwa mwayer
- 51 remòk chasnèj
- 322 chajè
- 37 aparèy pou soufle nèj

Yo pral itilize sèvis remokaj nan kote ki annapre la yo: I-84 (Orange), I-684 (Putnam), I-390 (Steuben), I-86 (Chemung), ak I-81 (Onondaga). Sèvis remokaj yo pral itilize nan Hutchinson River Parkway, Cross County Parkway, Saw Mill River Parkway, Sprain Brook State Parkway, ak Taconic State Parkway. Nou pral reyevalye bezwen pou plis sèvis remokaj a mezi evènman an ap dewoule. Kamyon HELP yo ak èdtan sèvis yo pral pwolonje pandan jounen samdi a nan rejon Mid-Hudson.

Sant Jesyon Sikilasyon yo nan rejon ki afekte yo pral afiche mesaj ki gen rapò ak meteyo sou pano mesaj varyab yo ki pral itilize pou sipòte ensidan nan tan reyèl ak restriksyon veyikil potansyèl (si sa nesesè).

Pou jwenn dènye enfòmasyon sou sikilasyon yo, rele 511, vizite www.511NY.org oswa telechaje aplikasyon mobil gratis 511NY la.

Otorite Thruway

Otorite Thruway pare pou li entèvni avèk 680 sipèvizè ak operatè ki disponib. Kantite ekipman ak resous ki genyen nan tout eta a repati konsa:

- 367 gwo kamyon chasnèj pwa lou ak pwa mwayer
- 11 remòk chasnèj
- 67 gwo chajè
- 119,000 tòn sèl disponib

Yo itilize Pano pou Mesaj Varyab ak rezo sosyal yo pou avèti otomobilis yo sou kondisyon move tan ivè pandan yo sou Thruway la.

Otorite Thruway yo ankouraje otomobilis yo telechaje [aplikasyon mobil](#) li an, ki disponib gratis sou aparèy iPhone ak Android yo. Aplikasyon an bay otomobilis yo aksè dirèk ak enfòmasyon sou sikilasyon an nan tan reyèl, kamera sikilasyon yo nan tan reyèl, ansanm avèk asistans pou navigasyon pandan yo sou wout. Otomobilis yo ka enskri tou

pou yo resevwa [imèl TRANSalert](#) k ap bay dènye enfòmasyon sou kondisyon sikilasyon sou Thruway a.

Depatman Konsèvasyon Anviwònmantal (Department of Environmental Conservation)

Ofisyè Lapolis Pwoteksyon Anviwònman DEC yo, Gad Forè yo, anplwaye Jesyon Ijans yo, ak anplwaye rejyonal yo nan eta dalèt epi y ap siveye sitiayson k ap devlope a epi y ap fè patwouy aktivman nan zòn ak enfrastrikti ki afekte pa move tan an. Tout resous ki disponib yo, ki gen ladan siyè yo, yo pare pou ede ak nenpòt repons ijans.

DEC ap konseye itilizatè nan rejyon sovaj yo pou yo konsyan ak prepare pou kondisyon avalanch akòz tan an ki ka ogmante risk avalanch ou glisad yo oswa teren apik oswa ouvri. Gen plis enfòmasyon ki disponib [isit la](#).

DEC raple sila yo ki responsab pou netwaye ak jete nèj a gwo echèl pou yo swiv pi bon pratik jesyon yo pou ede redui posibilité pou gen polyan tankou sèl, sab, lwil, fatra oswa lòt debri nan nèj ki afekte kalite dlo a. Gen plis enfòmasyon ki disponib [isit la](#).

Biwo Pak, Lwazi ak Konsèvasyon Istorik (Office of Parks, Recreation and Historic Preservation)

Lapolis Pak Eta New York ak anplwaye pak yo rete alète epi y ap swiv deprè kondisyon metewolojik ak enpak yo. Vizitè pak yo dwe tcheke [parks.ny.gov](#) oswa rele biwo pak lokal yo pou yo jwenn dènye nouvèl konsènan lè fonksyonman pak yo, lè ouvèti ak fèmti yo.

Depatman Sèvis Piblik

Sèvis piblik New York genyen apeprè 6,750 travayè disponib pou angaje nan evalyasyon domaj, efò entèvansyon, reparasyon ak restorasyon atravè Eta New York. Pèsonèl ajans lan ap swiv travay sèvis piblik yo pandan tout evènman an epi sire sèvis piblik yo transfere anplwaye apwopriye nan rejyon ki gen pi gwo enpak yo.

Lapolis Eta New York

Lapolis Eta a pal siveye kondisyon yo deprè epi yo pral prepare pou deplwaye manm Patwouy anplis, jan sa nesesè. Tout machin katpakan ak veyikil espesyalize Lapolis Eta a yo, ki gen ladan motonèj ak veyikil itilitè tout tèren yo, anplas ak prè pou entèvansyon imedyat.

Otorite Enèji New York la (New York Power Authority, NYPA) ak Canal Corporation

Anplwaye Otorite Enèji New York la ak anplwaye Canal Corporation yo ap fè preparasyon pou asire tout enstalasyon yo, resous yo ak ekipman yo byen sekirize epi ke yo prè. Otorite Enèji a prepare pou sipòte aktivite restorasyon enèji si sa nesesè.

Otorite Transpò Metwopoliten

Otorite Transpò Metwopoliten (Metropolitan Transportation Authority, MTA) an ap siveye kondisyon meteyowolojik yo deprè pou asire sèvis san danje, ki fyab. Anplwaye

MTA yo pral pare pou pwopaje sèl ak netwaye platfòm ak eskalye glas yo, kenbe siyal, entèriptè, twazyèm ray ap fonksyone MTA Bridges and Tunnels ap konseye otomobilis yo pou yo kondui a vitès redwi.

Kliyan yo ankouraje tcheke new.mta.info pou dènye mizajou sou sèvis, ak pou itilize prekosyon pandan y ap navige sistèm lan. Kliyan yo tou ta dwe enskri pou sèvis alèt an tan reyèl yo atravè mesaj tèks oswa imèl. Alèt sa yo disponib tou atravè aplikasyon MTA yo: MYmta, Long Island Rail Road Train Time ak Metro-North Train Time.

Otorite Pòtyè a nan New York ak New Jersey (Port Authority of New York and New Jersey)

Otorite Pòtyè a ap siveye kondisyon meteyowolojik yo. Restriksyon pou vitès yo gendwa an vigè nan pon yo, ansanm ak wout pou ale ak pou sòti nan kafou yo. Yo ap ankouraje pasaje atravè enstalasyon Otorite Pòtyè yo pou kontakte konpayi otobis ak liy ayeryèn yo dirèkteman pou dènye enfòmasyon sou reta ak anilasyon. Pou dènye enfòmasyon yo sou etablisman Otorite Pòtyè yo, tanpri tcheke rezo sosyo yo, enskri pou [Alèt PA](#) yo oswa telechaje youn nan aplikasyon mobil PA yo, ki enkli [RidePATH](#) ki bay mizajou nan tan reyèl ak alèt pou sèvis PATH.

Konsèy sekirite

Deplasman nan sezon ivè

Prensipal kòz lanmò ak blesi pandan tanpèt ivè yo se aksidan ki gen rapò ak transpò. Anvan ou chita dèyè volan, pa blyi retire glas ak nèj ki sou machin ou an; bon vizyon se sekrè kondui byen. Planifye arè ou yo epi kite plis distans ant machin yo. Pote plis atansyon epi sonje pil nèj yo ka maske timoun ki pi piti yo. Toujou koresponn vitès ou selon kondisyon wout la epi selon meteyowolojik.

Li enpòtan pou chofè ki sou tout wout yo konnen vitès chasnèj yo se 56 kilomèt alè, sa ki nan anpil ka pi ba pase limit vitès ki make a, pou yo ka garanti sèl yo simen an rete nan vwa sikilasyon yo epi pa dispèse andeyò wout yo. Anpil fwa sou otowout ant eta yo, chasnèj yo opere kòtakòt, kòm se fason ki pi efikas epi ki ofri plis garanti pou netwaye plizyè vwa yon sèl kou.

Chofè machin ak pyeton dwe sonje chofè chasnèj yo ka wè devan yo sou yon distans limite, epi gwosè ak pwa chasnèj yo ka fè l difisil pou manevre epi frennen touswit. Nèj chasnèj la ap soufle dèyè li ka diminye vizibilite anpil oubyen kreye yon vwal blan. Chofè machin yo pa ta dwe eseye double chasnèj yo, ni swiv yo twò pre. Kote ki gen plis sekirite pou chofè machin yo woule se lwen dèyè chasnèj yo, kote wout la klè epi gen sèl sou li.

Men kèk nan konsèy ki pi enpòtan pou woule ansekirite:

- Lè tanpèt ivè yo rive, pa kondui si li pa vrèman nesesè.
- Pran prekosyon sou pon yo paske li ka fè glas la pi vit pase sou wout yo.

- Fèy mouye ki sou wout yo kapab lakòz atè a glise, sa ki fè li enpòtan pou kondui pi dousman lè wap pwoche kote ki kouvri ak fèy yo.
- Verifye machin ou gen ladan lenn, yon pèl, flach ak pil anplis, rad cho anplis, yon pè chèn pou kawotchou, kab boutè pou batri, manje ki bay enèji rapid ak rad ki gen koulè klere pou sèvi kòm drapo detrè.
- Kenbe tank gaz ou plen pou evite gazolin nan friz.
- Si ou gen telefòn selilè oswa yon wòki tòki disponib pou w sèvi, kenbe batri a chaje epi kenbe l avè ou tout lè ou ap vwayaje. Si ou ta vin bloke, ou ap kapab rele pou mande èd, enfòme sekouris yo sou kote ou ye.
- Asire ou ke yon moun konnen plan vwayaj ou.
- Pandan ou ap kondui, kenbe machin yo lwen glas ak nèj.
- Planifye arè yo epi kenbe distans ant machin yo. Toujou koresponn vitès ou selon kondisyon wout la epi selon meteyowolojik.

Pou plis konsèy sou sekirite, ale sou sitwèb Divizyon Sekirite Enteryè ak Sèvis Ijans (Division of Homeland Security and Emergency Services) Eta New York la nan <https://www.dhses.ny.gov/safety-and-prevention>.

###

Lòt nouvèl disponib sou sit www.governor.ny.gov
 Eta New York | Chanm Egzekitif | press.office@exec.ny.gov | 518.474.8418

[ANILE ENSKRIPSYON OU](#)